

# Karatas ezektsa bo ziwatahaka

Taparaka Deus Sudeutsa zuba nisiwatawy iwaze hi ityryktsa niyziknaha, isopykwytza nisispirikpoko, sihyrytsa sipiakzyzykyhytsa. Iwa ityryktsa ziwatawy. Sidisahawy kino niwatihi ikaty hi ziknatahadisahakanaha sibo zuba ziknakara. Aiba Sesus Kiristu izumuze mysapyzeken nihyrikosokda iwaze asaktsa Sesus humo sispirikporëtsa myziknaha zeka Deus tuk tahawahi mynapykyryknaha. Sesus Kiristu tazo bo ziksizoze ituk zinymyrykynahatsa paikpa tisapyrëna ty niharapespirikpokonaha. Sizubarëtsa Sesus humo sispirikporëtsa, Sudeutsabyitsa tuze iwatsahi Sudeutsa sopykwy batu aha tahyrytsa ty batu isty piakzyzyk. Pauro Karatas niparakze wastuhu Sudeutsa Sesus tuktsa pe niaha. — Ahahyrytsa piak tysizyzyktaha anahi Deus myzihikik — nikaranaha. Anahi Pauro ziwabyze sibo ziwatahaka ispe niy:

— Tsimyinaha tahahyrytsa ty batu isty piakzyzyk, Sesus humo ahaspirikporëtsa tu zeka Deus harere bo zuba ma tsimykaranaha anahi Deus myzihikik — niy. Iwa Deus Pauro ziapewywy iwaze aparakbaha tanymyryky.

---

## Tapara aparakbaha bo mytsaty mykara.

**1** <sup>1-2</sup> Uta Pauro. Ikiahatsa tsinakypykbanahaze Deus harere tsiwabytnaha ahabo iwatahaka. Deus zikwatawy. Kytsa humo ka batu. Deus myzo hi zikwatawy iykzoho mozik. Sesus Kiristu humo kino niwatihi zikwatawy atahi Deus zihyryzikpowy. Katukytsa kabaze modyhydyhykynahatsa, asa harere ahabo piwatahakanaha. Tynakypykknahatsa Karatas eze tsimaha. Tsinazuzukbanahaze Sesus harere tsiwabytnaha.

<sup>3</sup> Ahatsyhyryze Deus bo mopamykysoko:

— O Deus myzo Sesus tuktsa Karatas ezektsa tysisapywyky. O Sesus Kiristu mypehakatsa tysiakusukniwyky — my. Iwa ahatsyhyryze Deus bo mopamykysoko.

<sup>4</sup> Kiristu mysapyzeken nihyrikosokda, kytsa zibezekenahaze hyÿ zuba niy, iwatahi mysapybyitsa tsikykaranaha ihumo Deus nymyokzohik. Kiristu nihyrikosokdaze Deus nawa hi nizihikik. Iwaze mymytsumuëhĩ. Abaka hawa kytsa sisopyk batu tsimykaranaha, katsaktsa Kiristu humo

meky watu tsimoziknaha. <sup>5</sup>Iwatsahi Deus bo tynapamykysokonahaktsa! — O Deus ikia zuba wasani tsimykara. Ikia zuba tsamysapyrêta — tsimaha. Iwa hi tsimynakaranaha.

### Deus wasania ty zuba my.

<sup>6</sup>Kyze tubabatu Deus zahawatawy. Sesus Kiristu myzahasapywyky. Asiba Deus tsierek tsihikiknaha ana hi iwaby. Hawa tsimykaranaha batu isapy my, ana humo hi batu kahyrinomyry kapetu kasopyk:

— Nawa ha ty Karatas Ezektsa soho piwabyky wasani ja. Batu kanyhy — my. Usta maku mekywaha humo pahahyrinomyryky anahumo hi yhỹ tsimykaranaha. Atahi:

— Kaharere wasani my — mybarapetu nikara. Ikiahatsa iharere bo yhỹ tsimykaranaha zeka kaharere bo batu hỹ tsimaha. Kaharere humo tsimyspiriktsokdabanaha ana humo hi kamytsatyharêta mykara. <sup>7</sup>Tohi harere humo batu mysopyksapy my. Deus harere ana zuba wasani my. Simyknianikitsa ustsaharere ababo motsasokonaha iwa tihi:

— Myharere wasani — mybarapetu mykaranaha. Asahi Deus wasania ty hi myzapywak tsihikiknaha hỹ. Iwaze Deus wasania ty Sesus soho zisapybyrikinaha. <sup>8</sup>Aty zeka Deus wasania ty mekywaha tu pahahyrinomyry, iharere mysapybyri iwaze iharere meky watu my. Iwaze Deus ispe:

— O ikiahatsa batu ahamysapy tsimaha. Sinini ykarawy bo pahapehahik — iwa Deus motsasoko zeka wasani my. Uta, katukytsa, bijoikpe iknykta iwatsa Deus wasania ty mekywahatu pahahyrinomyry zeka Deus mysininivy bo wasani mytsaty mykara. <sup>9</sup>Tubabatu tapehawy iksaso. Abaka ababo atsatu motsasokozo. Amakata ababo mozumu zeka meky harere pahahyrinomyryky Deus hi:

— O atakta batu imysapy my. Sinini ykarawy bo pipehahik — niy. Deus wasania ty katsa botu ababo tsiktsasokonaha ana bo hi zuba hỹ tsimykaranaha. <sup>10</sup>Iwaze kino Deus wasania ty motsasokoze kytsa hi — O atakta mykparawy — iwa batu mozihikik. Deus kape my zeka:

— O atakta tsimysapyrêta — my ana hi mozihikik. Deus kasoho ty motsasoziuku zeka kakurêta hỹ. Myzubaha kasoho motsasoziukunaha zeka anahi mozihikik iwa zeka batu Sesus tsumuêhîtsa babata ziky.

### Hawa niyta Pauro Deus ykzoho niyzik.

<sup>11</sup>Kyze — O katukytsa Deus harere ababo motsasoko kytsa harere ba ziktsaso. Ataharere bo ka kytsa batu mytsaty zikaha. <sup>12</sup>Ataharere ty ka kytsa batu katy hyrinomyry. Sesus Kiristu hi zikyrynomyry hỹ.

<sup>13</sup>Kasoho botu tsiwabynaha hỹ. Utakta Sudeu my. Iwatahi Moises harere bo zuba hỹ ziknakara. Sesus harere humo hỹ nikaranahatsa iksisukyryky. Asahi inauzuzukbanahaze Sesus harere ziwabykynaha asahi

zikanasisukyryikik. Iwa Sesus harere bo ka ja ba hỹ zikaha mytsaty ahabyitatu ikykara. <sup>14</sup>Taparaktsa myzotsa harere bo pykyhytu hyỹ ikykara. Aparakbaha mysopyk humo zuba yhỹ ziknakara. Katsa zuba myhyrinyrẽtsa mytsaty ahabyita tu iky, iwatahi nanabyi sisopyk humo hyỹ ikykara.

<sup>15</sup>Deus hi ziksapywy. Kapurukbyizetu Deus zikwatawy. Iwaze ikypykze Deus wasania ty ustsá kytsa bo zikpeha. Kakzohota tu Deus wasania ty ustsá kytsa bo motsasoko. <sup>16</sup>Deus tatse kabo ziwatawy iwaze Deus tse zikspirikpoziuku. Iwatahi aparakbaha Sudeutsabyitsa bo Sesus soho iktsasoko. Iwaze aparakbaha bo batu tyso: “O amy ty Sesus soho mysihyrinyrẽtsa” — my. Iwa batu tyso. <sup>17</sup>Damasko eze tuze batu Serusarẽhe bo zuk. Batu Sesus ykzohotsa bo kozore. Atazuba Arabija imyra zubaha bo inakozore. Aiba tohi eze zuba Damasko bo ikziksizo. <sup>18</sup>Nawa harakykbyi niytyk tseheze Serusarẽhe bo ikparak. Peduru bo ikumu, ituk ikapykyrykspyk mytsyhyrytsa wa ikuruze iwaze Damasko bo ikzisko. <sup>19</sup>Serusarẽhe eze tuze, ustsá Sesus ykzohotsa ty batu isty ny. Mypehakatsa Sesus tsy bo zuba ikozo. Tsiaku inarokota.

<sup>20</sup>Nawa ha ty ahabo piwatahaka wasapehe mykara. Deus okzeka piwatahaka batu kamyspihikbata.

<sup>21</sup>Kyze Sirija bo ikukuru. Iwaze Sirisia bo ikukuru. <sup>22</sup>Kytsa Sesus tuktsa Sudeu ezektsa batu katyny niaha. Asaktsa batu katy nyhabyitsa maha. <sup>23</sup>Iwaze zuba kasoho ziwabynaha:

— O atakta tubabatu katsa nimysukyryikik abaka Sesus harere bo hyỹ isopyk ihumo tspirikporẽta niyzik. Atahi myzubaha bo motsasoko hawa Sesus harere bo hyỹ mykaranahaze hawa iharere bo zuba yhỹ mykaranaha iwa motsasoko — mykaranaha. Iwa kasoho ziwabykynaha. <sup>24</sup>Iwaze Sesus tuktsa Deus bo mosakibazikiknaha:

— O Deus katsaktsa mykurẽtsa. Hawa tsimykara Pauro humo mykurẽtsa tsimoziknaha — nikaranaha.

### Pauro ustsá sakzohotsa tuk my.

**2** <sup>1-2</sup>— Nawa niytyk tseheze kĩsĩ ziharamuze Serusarẽhe bo ikziksizo. Deus kape niy: “Ikiakta Serusarẽhe bokta!” — niy.

Hyỹ iky. Iwaze Serusarẽhe bo ikparakzo. Baranabe katuk niukuru. Katsa Titu pe tsikaha.

— Iki tihikta! — tsikaha.

Hyỹ niy. Titu Sudeubyita. Iwaze katsa Serusarẽhe bo tsikukurunaha. Tsikumunahaze myspirikpokotsa bo tsikaha. Katsa myspirikpokotsa bo zuba tsiktsasokonaha. Sudeutsabyitsa iksihyrinyrẽtsa myspirikpokotsa bo iktsaso. Kaharere Sesus soho Sudeutsabyitsa bo iktsasoikik iwa sibo iktsasoko. Uta kapetu kasopyk:

— O kaharere Sesus soho bo yhỹ zikaha byizeka hawa ty iktsasoko na haka mohokda — mytsaty ikykara. Iwatahi kaharere ty sibo iktsaso.

<sup>3</sup>Hawa niy tisapyrẽna. Mytukta Titu Sudeubyita batu ipe niaha:

— O tsiptakzykikta! — maha. Iwa batu tyso. <sup>4</sup>Kytsa asahi Sesus harere bo batu hỹ zikaha iwatsahi sispirikpoziubyitsa tu:

— Tsiptakzykik zeka wasani my — nikaranaha. Asaktsa sisukparatsitsa. Kytsa papatu nipupunaha. Batu Sesus tuktsabyitsa maha. Katsaktsa Sesus tuk atsatu mytsaty tsimykaranaha ana hi nizokparakanaha. Sesus sopyk ty zuba tsimykaranaha iwatsahi mykurẽtsa hỹ. Asaktsa pykyhytu Moises sopyk bo zuba hyỹ mykaranaha katsaktsa nawa tihi ana hi nizihikiknaha. <sup>5</sup>Utakta siharere bo hỹbyri ziknakara. Katsahi:

— Deus harere ty Sesus soho wasani zuba tsimaha. Iharere bo zuba hyỹ tsimykaranaha — tsikaha. Iwaze siharere batu mywabyhy.

<sup>6</sup>Asaktsa sihumo kytsa sizubarẽtsa mysipirikpokotsa watsa mykaranaha. Asa harere ezytyk ty batu tyso. Deus okezeka kytsa batu abazubatsa maha ihumo myzubaha atsatu maha. Iwa utakta niwatihi mytsaty mykara. <sup>7</sup>Deus wasania ty Sesus soho nitsasoikik ana soho hi:

— Ikia Deus wasania ty Sudeutsabyitsa bo motsasoko atsawatu Peduru Deus wasania ty Sudeutsa bo motsasoko. <sup>8</sup>Deus hi ikia zapehahik iakzohota hi Sudeutsabyitsa bo, izikwy atuk mynapykyryk. Astatu Deus Peduru zipehahik iakzohota hi Sudeutsa bo izikwy ituk mynapykyryk. Abaka ana humo kino tsipinymyrykynaha — niaha. <sup>9</sup>Iwaze Tsiaku, Peduru, Suão iwatsa sispirikpokotsitsa Sesus tuktsa tuk mype niaha:

— O mytukytsa Deus hi Sudeutsabyitsa bo pahapehahik ana hi ahyriziktsokzawy izikwy ty ahabo nyny my. Tisapyrẽna tsimaha — niaha. Iwatsahi mymykusukniwykynaha. Mytsyhyrypetsa humo paik niaha iwaze siharereziuwytta niyziknaha. Kyze mype niaha:

— O ikiahatsa mytuktsa babatsa. Ikia Baranabe kino niwatihi Sudeutsabyitsa boktsa! Utakta katyryktsa bo my. Iwa wasani my. <sup>10</sup>Tsimykurunahaze Sudeutsabyitsa bo katyryktsa sinamybyitsa bo ahamytsatyhu ja ispiriktsokda spiriktsoda byijataha! — niy.

— Yhỹ. Sinamybyitsa humo mymypokzitsirẽtsa — tsikaha. Botu sinamybyitsa tsiksitsumuẽhĩkĩnaha.

### **Pauro Peduru Sesus tuktsa okze zipehaka.**

<sup>11</sup>Kyze Peduru Ātiokia bo inakozoreze Sesus tuktsa okze tu zipehaka. Imysapybyita hi zibetsakak. <sup>12</sup>Tapara Peduru zumuze Sudeutsabyitsa asahi Sesus tuktsa maha situk tahadisahakanaha. Kyze Tsiaku itukytsa Ātiokia bo nisipehahik. Peduru sibo nikozoze tsikybyrẽta niyzik. Tapetu nikara:

— O asaktsa Tsiaku tuktsa asahi Sesus harere bo hyỹ nikaranahaze sispirikporẽtsa. Sudeutsabyitsa mysipiakzyzykik tsihikiknaha iwaze kahumo siharerewabymybarẽtsa, iwatahi Sudeutsabyitsa tuk ba zikdisahazo metutu mozikdisahaka iky — niy.

<sup>13</sup>Iwaze Sudeutsa Sesus harere bo hỹ nikananaha iwatsahi ihumo sispirikporẽtsa Peduru humo sisikpybyrẽtsa niyziknaha. Sispirikporẽtsa nikananaha iwatsa tu nawa ha ty batu simysapy nikananaha. Peduru watsa nikananaha. Hawa nikananaha Baranabe kino niwatihi siwatu nikara.

<sup>14</sup>Iwatahi Peduru ipehaka, Sesus harere humo batu h̃y niy iwatahi ibetsakak. Sesus tuktsa inazuzukbanahaze ibetsakak. Ipe icy:

— Tsiwabytoktokta! Ikia Sudeu tsimy. Hawa skaraba Sudeutsabyitsa sopyk ty mykara atsatu asopyk tsimy. Sudeutsa wata batu tsimykara. Iwatahi myzubaha Sudeutsa watsa sisopyk mozihikik. Ana kino batu imysapy my. Asopyksapy byihuja — icy.

**Sudeutsa, Sudeutsabyitsa niwatihi Sesus harere bo hỹ  
mykaranaha asahi zuba Deus bo mysioktyhyryk h̃y.**

<sup>15</sup>Kyze katsaktsa Sudeutsa tsimaha. Myzotsa Sudeutsa niaha. Utsa kytsa simysapybyitsa nikananaha iwa Sẽtios mekywatsa soho nisinaropykyknaha. <sup>16</sup>Iwatsa tu katsa Moises harere ibyky bo zuba yh̃y tsimykarannahaze. Deus batu mytyso:

— O asaktsa simysapyrẽtsa maha — iwa batu tyso. Katsa Sesus Kiristu harere bo zuba hỹ tsimykarannahaze Deus mysoho tihi:

— O asaktsa simysapyrẽtsa maha — my.

Katsa Sesus harere bo yh̃y tsimykarannaha humo Deus okzeka mymysapyrẽtsa tsimoziknaha. Batu aty tohi Moises harere ibyky bo yh̃y my zeka tsimysapyrẽta mozik. Deus tatuk hi mymyoktyhyryk iwatsahi mysapyrẽtsa tsimaha. Moises harere ibyky bo hỹy tsimykarannaha zeka Deus okzeka batu mysapy tsimaha, ana humo kino batu Deus bo mymyoktyhyryk. <sup>17</sup>Deus tatuk mymyoktyhyryk iwatsahi Moises harere ibyky tsimoewynaha. Sesus Kiristu harere bo zuba yh̃y tsimykarannaha. Iwaze aparakbaha mype:

— O ikiahatsa Sudeutsabyitsa watsa tsimoziknaha. Ahamysapybyitsa tsimykarannaha — mybarapetu mykaranaha. Iwa zeka Sesus Kiristu humo ahamysapybyitsa tsimykarannaha. Batu ba. Sesus Kiristu humo batu tymyi. <sup>18</sup>Kapetu kasopyk zeka:

— O Moises harere ibyky humo yh̃y mykarazo iwaze kasapybyita mykara zeka mohokda — my. Utatu pikspihikbataka. Iwa mytsaty mykara zeka iwatahi Moises harere ibyky batu h̃y mykara. Sizubarẽtsa kasoho tihi:

— O atakta batu imysapy my — mykaranaha. <sup>19</sup>Moises harere humo inymyrytohi iwa zeka iharere bo batu h̃y mykara. Iwatahi batu kasapy mozik iharere bo yh̃y mykara. Iwatahi Moises harere ibyky zimoewy. Abaka Kiristu harere bo zuba hỹy mykara isopyk mykara. Kiristu kasapyzeka iharapatawyhyta humo nihyrikosokda. Kasapyzeka

nihyrikosokdaze kasopykwy nepykba, abaka ituk mynapykyryk ihumo zuba kamysapyrêta mozik.

<sup>20</sup>Utakta Sesus zuba mozihikik mykara, atahi kasapyzeyky nihyrikosokda iwatahi kahumo izihik bara ty ka pimoewy mykara. Kiristu hyrikoso katuk mynapykyryk ihumo zuba mozuruku, iwatahi abaka kasopykwy pimoewy. Abaka Deus tse humo kaspirikporêta. Atahi namykse nikara ana humo hi utakta batu kawahi zikara. Sesus kapokzi tsimypokzitsiarêta iwatahi ituk mynapykyryk. <sup>21</sup>Deus mymysapywyky ana humo hi Kiristu mysapyzeyky nihyrikosokda. Iwatahi kakurêta. Deus mype my zeka:

— O ikiahatsa ahamysapyrêtsa Moises harere ibyky humo tsimykarana — Iwa batu tyso. Iwa niy zeka hawa hâta sa Kiristu nihyrikosokda. Nawa batu ba. Kiristu harere bo hyÿ ikykara ihumo zuba kaspirikporêta iwaze Deus tihi:

— Ikia tsamysapyrêta. Kiristu katse asapyzeyky nihyrikosokda ana humo hi tsamysapyrêta — my.

**Ikiahatsa Moises Deus harere ibyky naha bo ja yhÿ tsimaha. Deus wasania ty bo ja yhÿ tsimaha. Na waha sa tsimyzihikiknaha.**

**3** <sup>1</sup>— O Karatas ezektsa ahakedepyktsa zuba. Aty sa zahaspikhikbataka. Ahape mybarapetu nikaranaha. Hawa kytsa Sesus Kiristu iharapatawyhyta humo zihyrikikiknaha iwa zibezenaha, ana kino botu ababo iktsaso. <sup>2</sup>Ahabo motsaso zeka my:

“Hawa sa Deus hyrikoso ahatuk mynapykyryk. Ikiahatsa Moises harere ibyky bo yhÿ tsikykarana hatsa ja Deus hyrikoso ahatuk napykyryk my. Ikiahatsa tihi:

‘Batu ba.’ Katsakta Sesus Kiristu harere bo hyÿ tsikykarana haze iharere humo myspirikporêtsa, ana humo hi Deus hyrikoso mytuk mynapykyryk” — tsimaha.

<sup>3</sup>— O ikiahatsa ahakedepyktsa. Sesus harere bo hyÿ tsikykarana haze Deus hyrikoso ahatuk mynapykyryk. Abaka Deus hyrikoso tsiperek tsihikiknaha. Iwatsahi ahape tu tsimykarana: “Abaka myhumo zuba tsimyzurukunaha tsimaha” — my. Batu wasani my. <sup>4</sup>Hawa ababo nikara ana bo hi batu mytsaty tsimykarana Deus hyrikoso ahatuk mynapykyryk iwatsahi ihumo arek arek byitaha! <sup>5</sup>Deus hi tahyrikoso ababo zipaha iwatahi ahatuk mynapykyryk. Ihyrikoso humo hawaha kytsa batu zikaha atahi ahatuk ziknakara. Iwa humo nikara. Sesus harere bo hyÿ tsikykarana haze ahatuk nikara. Iwa hÿ. Moises harere ibyky bo yhÿ tsikykarana zeka Deus hyrikoso batu ahatuk mynapykyryk.

<sup>6</sup>Aba Abarão soho bo mytsaty tahaktsa! Deus papeu humo isoho botu ziwataha:

— O atakta Deus humo tspirikporêta iwaze Deus tihi: “O Abarão kaharere bo hyÿ nikara kahumo tspirikporêta tsimysapyrêta niyzik.

Isapybyikia ty nikara nisiokzohik ikspiritsokdatawy” — niy. Iwa Deus papeu humo botu ziwatahaka niy.

<sup>7</sup>Iwatsahi asaktsa Sesus harere bo hyĩ mykaranaha iwatsahi Abarão watsa maha. Sispirikporētsa Abarão tsekokatsa babatsa maha sisoho humo tsimaha. <sup>8</sup>Tubabatu taparaktsa botu Deus papeu humo ziwatahaba Sudeutsabyitsa soho botu ziwatahakanaha. Asaktsa Deus harere bo hyĩ mykaranaha iwatsahi ihumo sispirikporētsa maha. Iwaze Deus tihi:

— O asaktsa Sudeutsabyitsa kahumo sispirikporētsa iwaze ispe: “O ikiahatsa ahamysapyrētsa tsimoziknaha” — my.

Iwa Deus papeu humo taparaktsa botu ziwatahakanaha. Hawa Deus wasania ty Abarão bo nitsasoko aibani zuba atsatu mykara. Iwaze nawa ha ty botu nitsasoko atsatu wasani my ana kino aparakbaha ziwatahakanaha. Deus tihi:

— O Abarão ikia kahumo tsaspirikporēta iwaze mybarawy sizubarētsa ahumo mysisapywyky. Myzubaha nanabyitaba ahumo mysisapywyky — niy.

Iwa taparaktsa Deus papeu humo ziwatahakanaha. <sup>9</sup>Iwatahi Abarão Deus harere bo hyĩ nikara iwatahi ihumo tispirikporēta iwaze Deus zisapywyky. Aty Deus harere bo hyĩ mykara ihumo mospirikpo zeka ibo pisapywyky. Abarão wata nikara. Iwa myhỹ.

<sup>10</sup>Iwaze aty zeka:

— O utakta Moises harere ibyky bo yhỹ my zeka iwaze kamysapyrēta mozik — my. Mytsaty ahabyita mykara atakta Deus isoho tihi:

— Atakta batu isapy my — my. Taparaktsa Deus papeu humo ziwatahakanahaze:

— Aty zeka Moises harere bo yhỹ mykara iwaze iharere bo estuba zuba batu hỹ my iwaze Deus ipe my: “Ikia batu amysapy” my — iwa Deus ziwatahaka. <sup>11</sup>Taparaktsa Deus papeu humo ziwatahakanaha:

— Ata zuba Deus harere bo hyĩ mykara ihumo mospirikpoko ata soho Deus hi “O wasani tsimozik” my iwa ziwatahakanaha. Batu aty tohi Moises harere ibyky tsizubarēna humo hyĩ mykara, anatyhi batu zikaha. Ana humo kino myhyrinyrētsa. <sup>12</sup>Aty zeka estuba Moises harere ibyky bo hyĩ my zeka batu atsa botu Deus harere bo hyĩ mykara, atakta ihumo batu ispirikpo. Aty Deus humo tispirikporēta tu meky watu niyzik. Aty Moises harere ibyky bo yhỹ mykara atahi iharere bo zuba mykara hỹ. Aty Deus harere bo yhỹ mykara iharere humo mospirikpoko — my. Ana kino meky watu mozik. Iwa my.

<sup>13</sup>Tubabatu Deus papeu humo:

— Aty kytsa iharapatawyhyta humo pibezenaha atakta tamysapybyizikyty zibezenaha. Iwatsahi pibezenaha zeka wasani my — iwa ziwatahakanaha. Katsa niwatihi. Mysapybyitsa tsikykaranaha Kiristu hi mysapyzeken nihyrikosokda. <sup>14</sup>Atahi kytsa iharapatawyhyta humo

zihyrizikiknaha iwatahi mysapyzeken nihyrikosokda. Nihyrikosokdaze mysapybyikitsa tsikykaranaha ihumo Deus mymyokzohik. Deus hi:

— Ikiahatsa kaokzeka tsahamysapyrêtsa — my. Tubabatu Abarão Deus harere bo hỹ ziknakara ihumo nispirikpokoze Deus isoho tihi:

— O ikia tsamysapyrêta — niy. Katsakta Abarão watsa tsimaha. Deus harere bo hỹ tsimykaranaha ihumo tsimyspirikponaha iwaze Deus hyrikoso mytuk mynapykyryk. Iwahatu kytsa Sudeutsabyitsa iharere bo hỹ mykaranaha zeka ihumo sispirikporêtsa moziknaha. Deus hyrikoso sibo zipheha, ihyrikoso situk mynapykyryk. Iwa myh̃.

**Moises Deus harere taparaky nitsasoko.**

**Hawa Deus harere ty wasani mykara.**

<sup>15</sup>— O katukytsa hawa tsimyzurukunaha humo motsasoko. Kytsa petoktsa atsatu mozihikiknaha anasoho papeu humo piwatahakanaha. Zikspiriktsokdanaha bara ty hi petoktsa naro ziwatahakanaha. Iwaze batu aty tohi papeu humo ba zimyi. Estuba zikino batu arek ziky. Utsa harere papeu humo piwatahaka batu ziky. Hawa ziwatahakanaha anatzuba mykaranaha.

<sup>16</sup>Iwata tubabatu Deus Abarão bo nitsasoko. “O ikia pasapywyky. Estuba zubata atsekoka iknykta ibo pisapywyky” nikara. Deus watahaha ty batu tyso atsekokatsa sizubarêtsa bo mysisapywyky iwatahaha tihi estuba zuba atsekoka iknykta ibo pisapywyky — niy. Abaka Kiristu soho humo myhyrinymyrêtsa h̃.

<sup>17</sup>Nawa ha ty motsasoko pahahyrinymyry. Tubabatu Deus Abarão bo nitsasoko. Ipe niy:

— O ikia pasapywyky. Kaharere humo yh̃ tsimy h̃ — niy. Iwaze kwatero sêtos terita niytk tseheze Deus Moises bo iharere nitsasoko. Nawa ha ty Deus Abarão pe wasani my. Nawa ha ty Deus Moises pe wasani my. Petoktsa hatsa bo nitsasoko. Tapara Deus Abarão pe niy:

— O ikia pasapywyky — niy. Iwaze usta harere Moises bo nitsasoko taparaky harere batu meky watu ana kino tapara tu ituk nitsasoko.

<sup>18</sup>Iwatsahi hawa Deus mymysapywy tsihikik iharere humo zuba hỹ tsimykaranaha. Katsa Moises harere ibyky bo yh̃ tsimaha zeka Deus isapyrênikia ty batu mybo nyny my. Deus isapyrênikia ty Abarão bo nyny niy. Amy humo niy. Iharere humo ipe niy iwatahi isapyrênikia ty ibo nyny niyhy.

<sup>19</sup>Iwaze kytsa mytsaty mykaranaha. Amo skaraba Moises harere ibyky nitsasoko. Moises harere puêtsik ana hi Deus botu Abarão pe niy nimyhyrinymyryky, mysapybyitsa tsikykaranaha nimywatawyky. Abarão tsekoka Kiristu batu isukmo taziwazy iwaze Moises harere nitsasoko ana bo hi yh̃ tsimykaranaha. Kiristu izumuze Moises sopyk tsimoewynaha. Deus bjoikpe iknyktsa inasipeha iharere nitsasoko Moises bo niaha.



Inasiknahaze nitsasokonaha maku estuba zubata bo niaha. Iwaze zikiehe atakta Moises myzubaha bo atsawatu nitsasoko. <sup>20</sup>Deus Abarão pe niy ibo zuba nitsasoko. Bijoikpe iknyktsa bo batu tyso. Utsa kytsa bo batu tyso. Abarão bo zuba nitsasoko hỹ.

**Amy sa Moises Deus harere taparaky nitsaso wasani niy.**

<sup>21</sup>Kyze kytsa tahapetu sisopyk:

— O Moises Deus iwatahaka zika Deus harere meky watu ja. Katsa Deus tuk mywahi tsinapykyryknaha Moises watahaha humo ja ana humo hi tsimykaranaha — maha. Batu ba. Moises watahaha bo hyỹ tsimahaze batu mysapy tsimoziknaha. Iwa hỹ. <sup>22</sup>Deus watahaha tihi:

— Aparakbaha mybarawy ezektsa imysapybara katsa mytuk. Asaktsa Deus humo sispirikporëtsa amy ty Deus botu nitsaso isapyrënikia ty sibo nyny mynakara — niy.

<sup>23</sup>Tapara Moises harere ibyky bo yhỹ nikaranaha. Sihurukutsa watsa asahi ba zikwaknaha isopykwy batu zikaha. Bykyze Sesus harere bo hyỹ mykaranaha iwaze ihumo sispirikporëtsa moziknaha. <sup>24</sup>Iwatahi Moises harere ibyky myhyrinymyrytsa wata my. Nawa ha ty batu isapy nimyhyrinymyry. Isopykwy humo kino mysapybyitsa tsikykaranaha nimyhyrinymyryky iwaze Kiristu izumuze katsaktsa iharere bo hyỹ tsimykaranaha ihumo mspirikporëtsa tsimoziknaha ana humo hi mymysapyrëtsa tsimoziknaha. <sup>25</sup>Abaka Kiristu harere bo hyỹ tsimykaranaha ihumo mspirikporëtsa Deus okzeka mymysapyrëtsa iwatsahi Moises harere ibyky tsmoewynaha.

<sup>26</sup>Ikiahatsa Kiristu Sesus harere bo zuba hyỹ tsimykaranaha iwatsahi ihumo ahaspirikporëtsa iwatsahi Deus hyrytsa tsimoziknaha. <sup>27</sup>Sesus humo ahaspirikporëtsa kytsa zahaharasusuhiknaha niaha. Ikiahatsa Kiristu watsa puëtsik tsimyzihikiknaha. <sup>28</sup>Iwatsahi myzubarëtsa Sesus tuktsa maha, Deus okzeka Sudeutsa Sudeutsabyitsa watsa my. Kytsa tarabaja batu okyrysaro humo sinamyrëtsa watsa my. Maku kino wytykyryk wahaza my. Deus okzeka atsaezubaha maha. Sesus Kiristu humo sispirikporëtsa Deus okzeka atsabarëtsa maha. <sup>29</sup>Iwatsahi Kiristu harere bo hyỹ tsimykaranaha ihumo mspirikporëtsa katsa Abarão tsekokatsa watsa. Katsaktsa Abarão sapyzeken tsimaha iwaze Deus isapyrënikia ty ibo nitsasoko. Abaka atahi mybo nyny mykara.

**4** <sup>1</sup>Makuskyry iykpykbyize batu ihyrinymyry. Batu inamyky. Puëtsik pyk myze taypykze iwaze tisokpykziurëta. Tsinamyrëta. Iykpyk byizeka maku tarabaja batu okyrysaro wata, tahawatu zipehkanaha. Utsa kytsa harere bo yhỹ mynakara. <sup>2</sup>Mytaypykze ihyrinymyrytsa zihyrynimyryknaha. Amakata inamy perykytsa. Asaktsa ihumo simypokzitsiukrëtsa. Iwa isopyk. Kyze izo tihi:

— Aba katse itaypyk niy abaka batu zipokzitsinaha — niy.

<sup>3</sup>Iwata katsa deustsabyitsa harere humo yh̄y tsikykaranaha. Sipokso mypybyr̄etsa. Kyze Deus harere ty humo tsiwabyziunaha. <sup>4</sup>Kyze nawa zuruze Deus botu ziwatawy Deus tatse mybarawy ezezkta bo zipedahik. Atahi mybarawy eze nipuruk mywata niyzik. Mybarawy ezezkatsa ije niyzik. Taypykykze Moises harere ibyky bo yh̄y ziknakara. <sup>5</sup>Iwaze myzubaha bo Deus bo mymyoktyhyryk. Katsaktsa Moises harere ibyky bo yh̄y tsimyzihikiknaha katsa kino mymyoktyhyryk. Mysapyzeken nihyrikosokda iwatahi mysapybyitsa tsikykaranaha Deus nimyokzohik iwatsahi ihyrytsa tsikyziknaha.

<sup>6</sup>Iwaze Deus tse Sesus tazo hyrikoso mybo zipaha, mytuk tawahi mynapykyryk. Ata humo zuba katsa Deus bo mopamykysoikik:

— O myzo ikia humo ka mymypoکزitsiar̄eta — tsimaha.

<sup>7</sup>Iwa Deus niy. Tapara ikiahatsa nawaha ty batu isapy tsikykaranaha. Ahasopyksapyhu ja. Abaka Deus hyrytsa tsimoziknaha, ihyrytsa tuze isapyr̄enikia ty botu nitsaso ahabo nyny my.

#### **Pauro Karatas ezezkta humo paikpa mytsaty ziknakara.**

<sup>8</sup>Tubabatu Deus harere bo batu h̄y tsikykaranaha ahaspirikpobyitsa tsikykaranaha iwaze deustsabyitsa hyrikoso sapybara harere bo zuba yh̄y tsikykaranaha. <sup>9</sup>Abaka meky watu. Deus humo ahahyrinymyr̄etsa. Deus hiba zahany, iwatuze hawa skaraba deustsabyitsa harere bo yh̄y tsimykaranahazo. Siharere humo ahabyitsa tu ana humo hi tsimyzihikikzonaha.

<sup>10</sup>Ikiahatsa hawaze ja, byzoje pirahanahaze niytyk tseheze iwa ana soho ty pykyhytu tsiwabytoktonaha. <sup>11</sup>Hawa tsimykaranaha paikpa mytsaty tsimykaranaha. Iwaze kapetu kasopyk:

— Nawa ha ty Sesus harere iksihyrinymyryky batu ja — mykara.

<sup>12</sup>— O katukytsa! Ahabo myzapykyky. Tubabatu Moises harere ty pykyhytu yh̄y ikykara. Kyze meky watu ikyzik. Ahawatu ikyzik. Abaka ikiahatsa Moises harere bo yh̄y tsimyzihikikzonaha iwatsahi Deus okzeka ahamysapyr̄etsa tsimoziknaha mytsaty ahabyitsa tsimykaranaha. Tspimiyikinaha zeka ba kahumo zikaha — my. <sup>13</sup>Ahaspiriktsokda byihuja tapara ahabo iknakozoreze kamyitsapyr̄eta ikykara iwatatu Deus harere ahabo iktsasoko. <sup>14</sup>Kamyitsapyre tuze kapokso batu ahasikpyby. Kaharere humo tsiwabytoktonaha. Bijoikpe iknykta Deus tsumūeh̄itsa Sesus Kiristu watihi ahabo my zeka ja hawa siharere tsipiwabynaha iwa kaharere tsiwabykynaha. Kahumo ka tsamyharerewabyr̄etsa h̄y. <sup>15</sup>Ahakur̄etsa tsikaha. Kahumo tsimypoکزitsir̄etsa h̄y. Ahahyriziktsa kabo tsiksibobokyzykynaha. Hawa ha ty ahabo ipokzitsia ty kabo tsinyny tsihikiknaha. <sup>16</sup>Utakta Deus harere baba humo ahabo iktsaso ana humo hi ja ahakuriukr̄etsa tsimykaranaha.

<sup>17</sup>Asaktsa Deus soho ty mybarapetu mykaranaha siharere baba zuba tsiwabyziukunaha. Ahahumo sizokdir̄etsa. Ahaokzeka wasanitsa

watsa mynapykyryknaha iwa zeka kaharere bo batu hỹ tsimaha, ana hi mozihihiknaha. Iwaze siharere bo zuba yhỹ tsimykaranaha mytsaty mykaranaha. <sup>18</sup>Aparakbaha ahaokzeka simysapyrẽtsa mahaze pahasapywykynaha zeka wasani myhỹ. Ahatukbyitsa tuze pahasapywykynaha zeka wasani my.

<sup>19</sup>— O katukytsa ahahumo kamypokzitsiarẽta. Utakta wytyk wata. Atywatatsa tabykyhy pepurukze tsimyitsapyrẽtatsa! Ikiahatsa Kiristu harere tsikaeni zuba ahahyrinymyrẽtsa iwatahi ahatsyhyryze sinini mykara. Hawa wytyk ibykyhy humo tsimyitsapyrẽtatsa wata ahatsyhyryze sinini mykara. Ikiahatsa Sesus tuktsa babatsa tsimoziknaha ana humo hi ahatsyhyryze sinini mykara. <sup>20</sup>O katukytsa ahahumo kahyrizikbarẽta. Ahabo tsimpamykyso tsihikiknaha. Batu zik utakta nokponi mynapykyryk. Kaharere humo pahatsumuẽhĩ tsihikik. Ahasoho bo paikpa mytsaty mykara — my.

**Deus harere wytykyryk petokorok waza my. Sara Aka niwatihi.**

<sup>21</sup>Aty zeka:

— Utakta Moises harere ibyky bo yhỹ mozihihik iwatahi Deus okzeka kamysapyrẽta mozik — my. Ikiape my:

— O Moises harere ibyky tsiwabyziuku — my. <sup>22</sup>Tubabatu Abarão hyrytsa petoktsa niy. Taparaktatsa tsumuẽhĩtsa Aka inarokotatsa atatsa humo estuba zuba nihyrytsa iwaze itse nipuruk. Bykyze ioke babatatsa Sara inarokotatsa humo niwatihi estuba zuba nihyrytsa iwaze itse nipuruk. <sup>23</sup>Iwaze itse taparakta ije sitsumuẽhĩtsa niy. Atahi nipurukze siza siza byiki hyrytsa wa tihĩ niy. Usta itse iykpykyhyzytykta batu. Deus harere hi nitsaso atsatu wasani niy. Abarão Sara ahatsa nipuruk sitsaibatsa tu Deus harere humo zuba itse iykpykyhyzytykta.

<sup>24-25</sup>Iwa piwataha iwaze pahahyrinymyry. Wytykyryk petokokzahaza Deus harere petok zuba waha. Tapara Deus harere Moises bo nitsasoko atahi Deus tyryktsa bo nitsasoko. Anaharere wytyk sitsumuẽhĩtsa watatsa my. Bykyze Deus harere Sesus soho nitsasoko asahi ihumo sispirikporẽtsa Deus tyryktsa moziknaha. Usa harere wytyk ioke babatatsa watatsa my. Asiza harere wytykyryk petokokzahaza soho humo pahatsumuẽhĩ.

Moises iwatahaha soho ty mykara. Anaka hara bijobonita ikny inasikze anaharere aparakbaha bo nitsaso. Aparakbaha Sudeutsa hara bijobonikiha Sinija inarokoha mykaranaha. Aparakbaha Arabija ezektsa ana hara bijoboniki ha Aka inarokoha mykaranaha. Ana hara bijobonikiha atatsa watatsa atatsa katsa sitsumuẽhĩtsa niy my. Iwatatsahi itsekokatsa batu ziksibetsanaha. Serusarẽhe soho bo mytsaty ziknakaranaha. Asahi Moises harere ibyky humo zuba hyỹ mykaranaha. Asaktsa Sesus Kiristu harere bo batu hỹ zikaha. Iwatsahi asahi Moises iwatahaha bo zuba hyỹ mykaranaha sitsumuẽhĩtsa tsekokatsa watsa maha.

<sup>26</sup>Katsakta Deus harere bo hyĩ tsimykaranaha iwaze ihumo myspirikporētsa tsimoziknaha. Iwatsahi Deus okzeka mysapyrētsa tsimoziknaha Serusarēhe myjewa. Usa Serusarēhe ezytyk bijoikpe ikny mynasik anahi myjewa. Atatsa itsekokatsa Moises iwatahaha soho tsikaeni zuba mytsaty mykaranaha. Sesus harere bo zuba hyĩ mynakaranaha. <sup>27</sup>Deus watahaha botu hi:

— O wytykyryk ikiahaka ahabykyhybyiza ahakurēza!

Ikiahaka ahabykyhybyiza hi ba itsapyriziyk ahakurēza!

Ikiahaka ahahyrytsa tsimysiubaranaha.

Ipytsakatatsa ihyrytsa sizubarētsa ikiahaka ahapytsabyiza waza tsimoziknaha,

asiza hi simyiwyyhyza iwazatu ikiahaka ahhyrytsa tsimysiubaranaha. Iwa Deus watahaha botu nitsasoko.

<sup>28</sup>Iwatahi katukytsa Deus hyrytsa tsimoziknaha. Sesus harere bo hyĩ tsimykaranaha iwatsahi ihumo ahaspirikporētsa iwatsahi Deus hyrytsa tsimoziknaha. Tubabatu Isake Abarão tse nipuruk, Deus harere humo zuba nipuruk. Abarão tse babata. Atsawatu ikiahatsa Deus hyrytsa tsimoziknaha. Sesus harere bo zuba hyĩ tsimykaranaha iwatsahi ahaspirikporētsa tsimoziknaha. Ahaspirikporētsa ziky Deus hyrytsa tsimoziknaha.

<sup>29</sup>Tubabatu Aka sitsumuēhĩtsa tse Abarão ioke babatatsa Sara tse nizukyryky. Abaka atsatu mykaranaha. Asakta Moises harere bo hyĩ mykaranaha asahi Sesus tuktsa mysisukyrikiknaha. Aparakbaha Sesus harere bo hyĩ mykaranaha Deus hyrikoso situk mynapykyryk asa hi mysisukyryknaha. <sup>30</sup>Deus watahaha hi:

— Sitsumuēhĩtsa tse humo kino mysiksiwyhik! Abarão oke babatatsa tse zuba tazo namy ty nyny mykara — iwa taparaktsa ziwatahakanaha.

<sup>31</sup>Iwaze katukytsa katsa batu tsumuēhĩtsa tsekokatsa watsa tsimaha. Moises harere ibyky humo ka ba hỹ zikaha. Katsakta ioke babatatsa tse watsa tsimaha. Sesus harere bo hyĩ tsimykaranaha iwaze ihumo myspirikporētsa iwatsahi Deus hyrytsa babatsa tsimoziknaha.

#### Aty sopyk humo sa tsimaha.

**5** <sup>1</sup>Kiristu humo mysapyrētsa iwaze taparaktsa harere bo batu mysopyk. Iwaze Moises harere bo zuba batu mytsatzyiu tsimaha. Kiristu mymybetesaka zeka ituk mywahi tsimyzurukunaktsa! Kiristu zikwy mytuk mynapykyryk iwatsahi hawa tsimyzurukunaha wasani tsimykaranaha. Iwa tsimypykyryknahaze usts kytza ahabo motsasonaha zeka:

— O taparaktsa sopykwy ty tsimaha iwatsahi Deus okzeka ahamysapyrētsa tsimoziknaha. Siharere bo yhỹ tsimaha! — mybarapetu mykaranaha. Siharere bo batu waby zikaha. Sitsumuēhĩtsa watsa batu tsimozikzonaha!

<sup>2</sup>Wabyziutaha! Uta Pauro ahape my:

— Ahanury ty myzyk myzyk bytihaktsa iwatsahi Deus okzeka ahamysapyrëtsa tsimoziknaha mytsaty ahabyitsa nikaranaha. Kytsa iwa maha zeka Kiristu ahasapyzekenihyrikosokdaze batu mysapy. Batu zahatsumuëhĩ. <sup>3</sup>Kaharere ty ahape myzo: “Aty zeka Moises harere ibyky humo tanury ty pizyzykik atakta Moises harere ibyky tsizubarëna bo hyÿ mykara. Batu estuba harere zuba, tsizubarëna mykara ziky”.

<sup>4</sup>Ikiahatsa Moises harere ibyky bo hyÿ tsimaha zeka iwatsahi Deus okzeka ahamysapyrëtsa tsimoziknaha mytsaty ahabyitsa nikaranaha, iwaze Kiristu metutu tsimypykyryknaha. Hawa tsimykaranaha humo batu pahasapywy batu ziky. Ikiahatsa tsipahanury zyzykiknaha zeka Deus okzeka batu ahamysapy Deus ba zahasapywyky.

<sup>5</sup>Katsakta Deus okzeka mysapyrëtsa Sesus harere bo hyÿ tsimykaranaha ihumo mspihikrëtsa. Deus hyrikoso mytuk mynapykyryk ana hi taperyky. Myakubyrisorokrëtsa tuze iwaze Deus mype tihi: “O ikiahatsa ahamysapyrëtsa Sesus humo ahaspihikrëtsa iharere bo hyÿ tsimykaranaha” — mykara.

Ana harere hi tsipiperyknaha hÿ. Myspirikporëtsa tu Deus zikwy humo anaharere hi ihyrikoso humo taperyky. <sup>6</sup>Iwatsahi Sesus Kiristu harere bo zuba hyÿ tsimykaranaha. Aty taty piak zyk zeka, usta taty piak zyk byizeka atsatu maha. Deus okzeka petoktsa harapewatu maha. Katsakta Sesus Kiristu harere bo hyÿ tsimykaranaha ihumo mspirikporëtsa tsimoziknaha iwatsahi tyharape pokzitsikinaha iwaze Deus mymysapywyky.

<sup>7</sup>Tapara ikiahatsa Sesus harere bo hyÿ tsimykaranaha iwaze ihumo tsisapybakanaha. Amo skaraba Sesus harere humo batu ahakparawy. Mektsa harere zuba tsiwabyziukunaha iwatsahi tsimyikiknaha. Sesus harere bo hyÿzo tahaktsa. <sup>8</sup>Deus zahawatawy iwatahi mektsa harere ty ka batu ahabo tyso. <sup>9</sup>Ana kino atsikara pytowy waha. Hawa katsakta pytowy tsikaeni zuba tiriko tuk ikykywy bykyze nawerekbaik. Pytowy na waha estuba zubata mektsa harere bo yhÿ my zeka ustsamysimiwybaka. <sup>10</sup>Utakta ikiahatsa humo kahyrinymyrëta hÿ. Katsakta Sesus harere bo hyÿ tsimykaranaha iwatsahi ihumo mspirikporëtsa kawata mytsaty tsimykaranaha. Hawa mytsaty tsimykaranaha kawatsa atsatu mytsaty tsimykaranaha. Atakta imysapybara ty zahahyrinymyryky iwatahi zahamiwyky sinini mykara. Deus hi ipe my:

— O ikia batu amysapy tsimy, hawa batu sapy kahyrytsa nisihyrinymyry — my.

Iwa Deus isoho humo mykara.

<sup>11</sup>— O katukytsa kahumo mytsatziutahaktsa! Amo skaraba kytsa ziksukyryknaha. Ahabo zeka ahanury ty tyszizyknahaktsa iwatsahi Deus okzeka ahamysapyrëtsa tsimoziknaha mykara iwa zeka ba zik

sukyrykynaha. Iwa batu tyso. Kaharere Kiristu soho ikykara ihumo ahaspirikporẽtsa iwatsahi Deus okzeka ahamysapyrẽtsa tsimoziknaha anahumo hi tahakyrikinaha. Hawa Sesus Kiristu ahasapyzky iharapatawyhyta humo zihyryzikiknaha, iwaze zibezena, anahumo hi katsa Deus okzeka mysapyrẽtsa anaharere humo hi tahakyrytyikiknaha. <sup>12</sup>Asaktsa ahape ahanury tsizyzyknahaktsa iwatsahi Deus okzeka ahamysapyrẽtsa tsimoziknaha. Asaktsa sokorotsapu siakparawy, asaktsa tahapiakzyzykbaiknaha iwatsahi tahamyitsapyrikiknaha ana humo kino mozihikik — my.

<sup>13</sup>— O katukytsa Deus humo ahamysapyrẽtsa. Iwatsahi ahaspirikporẽtsa tuze batu tyso. “O abaka hawa katsa tsimyzihikiknaha atsatu tsimykaranaha. Mysapybyitsatu tsimykaranaha” — Iwa batu tyso. Ahaspirikporẽtsa tyharape pokzitsikinahaktsa! <sup>14</sup>Moises harere ibyky taparaktsa mydiritsa kino niwatihi sisopykwy tu maha. Siwatahaha tihi: — Aotutsa pauksitsa humo tynasipokzitsikinaha, ahumo tu tsinakaranaha wa tihi tysipokzitsiki — niy. <sup>15</sup>Katukytsa pykyhytutaha! Siraratsa sirerẽtsa watsa asahi nahapeboroikiknaha iwa ahasopyk zeka hawatsa tsimykaranaha ustsba ziksipokzi tsihikik. Ikiahatsa ahaharerewabymybarẽtsa iwatsahi ustsba ziksipokzitsi iwaze siraratsa watsa ahasopyk.

### **Deus hyrikoso mytuk mynapykyrykze mysapyrẽtsa tsimoziknaha.**

<sup>16</sup>Kaharere bo wabyziutaha! Deus hyrikoso ahatuk mynapykyryk zeka iharere bo zuba hyỹ tsimykaranaha. Iharere tawaby zeka ana hi Deus mozihikik. Hawaha tsimyzihikiknaha bo ka mytsaty mytsaty byitaha. <sup>17</sup>Hawa katsa tsimyzihikiknaha Deus hyrikoso batu hỹ niy. Hawa Deus hyrikoso mozihikik anatyhi katsa batu hỹ tsikaha. Deus hyrikoso harere bo zuba yhỹ tsimykaranaha zeka hawa tsimyzihikiknaha batu zikaha. <sup>18</sup>Deus hyrikoso harere bo hyỹ tsimykaranaha zeka Moises harere ibyky tsizubarẽna bo batu mytsaty tsimykaranaha. Anaharere humo hi tsimykaranaha zeka Deus okzeka batu mysapy iwatsahi Moises harere ibyky bo batu hỹ ahasopyk.

<sup>19</sup>Hawa katsa tsimykaranaha ana humo hi mysoho baba tsipiwatawynaha iwatsahi aparakbaha myhumo sihyrinyrẽtsa. Iwa tsimykaranaha. Asaktsa Deus harere bo batu hỹ zikaha iwa mozurukunaha. Asaktsa usta oke bo hua mynakaranaha. Usta maku piwohiknaha. Kytsa wytykyryk mysipyryrykiknaha mowakryriwy waza sisopyk. <sup>20-21</sup>Kytsa deustsabyitsa bo napamykysoikiknaha. Asaktsa tahanamy zuba motsasoko:

— O atakta mydeus hi — mybarapetu mykaranaha. Ustsba kytsa namysukyrykynaha. Sisukyrytsitsa tu naharape huzeduikiknaha. Siokanirẽtsa simywyhytsa tu mynasisuknikinaha. Sizokdirẽtsa.

Sihyrizikzorētsa. Myharapepehaikiknaha iwatsahi metutu mopapahabakanaha. Mysiaknikinaha. Tsōsī humo pypykbeze mykaranaha. Utsa humo myharape huzezukunaha. Asaktsa iwa sisopyk batu Deus tyryktsa zikyriknaha. Deus harere humo batu siakparawy.

<sup>22-23</sup>Deus hyrikoso mynamykse zeka mytuk mynapykyryk ihumo meky watu tsimoziknaha. Deus hyrikoso humo ustsā aparakbaha bo tyharape pokzitsikinaha. Atahi mymykusukniwyky iwatsahi mykurētsa tsimykarana. Ihumo batu paikpa mytsaty tsimykarana. Mysopykziurētsa. Mykubyrisorokrētsa. Aparakbaha tuk ba ziksimyiki myhyrizikporētsa mysapyrētsa tsimaha. Mysakikihikrētsa. Batu tyso katsa zubatsa ty wasani tsimykarana. Mypetu mysopyk iwatsahi mysapybara ty batu h̄y tsimaha. Deus mysoho tihi:

— O ahamysapyrētsa tsimoziknaha — my. Mysapyrētsa tu zeka batu aty tohi mype ziky:

— O batu ahamysapy — maha. Iwa batu tyso zikaha. <sup>24</sup>Katsaktsa Sesus tuktsa tsimaha. Ihumo myspirikporētsa hawa ha ty tsimyzihikiknaha ana kino batu myty peha my. Hawa batu mysapy ana humo kino batu h̄y tsimaha. <sup>25</sup>Deus hyrikoso mytuk mynapykyryk zeka ata humo kino meky watu tsimoziknaha. Atahi mypehatsa mozik. Iwatsahi izikwy humo tsimyzurukunaha. Atazuba namypehaka iwatsahi iharere bo zuba ma tynakaranahaktsa! Hawa mymykzoze iwa tsimyzurukunaha. <sup>26</sup>Batu tyso:

— O katsa zuba wasani tsimaha. Iwa batu tyso. Aparakbaha tuk ahasakpare byihujataha! Utsa aparakbaha simysapyrētsa humo maha zeka ahazokdi byihujataha! kytsa — my.

### Tyharape tsumuēhīnahaktsa.

**6** <sup>1</sup>— O katukytsa aty zeka imysapybyikia ty my zeka ikiahatsaktsa Deus hyrikoso myzahakse ibo tsitsumuēhīnaha — ipe tsimaha:

— O katsy amysapybyikia ty tsikapybywykta! — tsimaha.

Ahaharereziu tuktu ja taha! Pykyhytutaha. Atsawatu tsimyzihikiknaha zeka ahamysapybyitsa tsimykarana. <sup>2</sup>Aty zeka iakubyikita bo iktsa tsimaha zeka ibo tsakusuknikinaha. Tyhapetsumuēhīnahaktsa kytsa! Iwaze anaharere humo Kiristu zahahyrinymyryky h̄y tsimykarana.

<sup>3</sup>Aty tapetu isopyk zeka:

— O utakta abazubata — mytsaty ahabyita mykara, myhyrizikwybyita tu tapetu isopyk mybarapetu mykara. <sup>4</sup>Hawa tsimykara ana soho bohi mytsatziu tsimykara. Tsipisapyky zeka tsakurētakta! Apetu asopyk. — Wasani mykara iwatahi kakurēta — my. Hawa ustsā mykaranaha sibo batu iktsa tsimy. Batu tyso:

— Ustsaktsa batu wasani mykaranaha iwatahi utakta wasani mynakara — my. Iwa batu tyso. <sup>5</sup>Ahazikara byihuja kytsa! Ahahyriziktsokzawy humo Deus ahabo nyny niy iwatsahi tsikahasopykziubanahaktsa!

<sup>6</sup>Aty Deus harere ty pahahyrinomyryky tahanamy ty ibo nyny tahaktsa! Ahanamy isapyrēnikia ty ibo tsipibiaknaha.

<sup>7</sup>Deus harere ty katy myi myiwy byitaha! Tsimytsasonaha zeka: — O uta kamysapyrēta my zeka Deus piksapywyky h̄y — tsimy. Iwa batu tyso tapetu zuba isopyk mybarapetu tsimy. Deus ta ba zik mospihikbata, atahi tsihyrinomyrēta h̄y. Hawa tsimykaranaha humo tsihyrinomyrēta.

<sup>8</sup>Aty zeka amytsa mysiparikik zeka atsatu zuba pusukuknaha. Batu mektsatu zikaha. Katsa niwatihi siriktsa mysiparikik nahatsa watsa tsimaha. Hawa ha ty mysapybyitsa tsimykaranaha zeka Deus tuk batu mywahi tsimynapykyryknaha. Katsaktsa Deus hyrikoso harere bo hȳ tsimykaranaha Deus tuk mywahi tsimynapykyryknaha.

<sup>9</sup>Iwaze tysapywykynahaktsa! Ahazikarabyitsa tu tsipisapywykynaha iwaze Deus isapyrēnikia ty ahabo nyny mykara. Iwatsahi mykurētsa tsimaha. <sup>10</sup>Iwatsahi tyharapetsumoēhikīnahaktsa kytsa! Asaktsa mytukytsa Sesus tuktsa asa bo hi tsipisapywykynaha h̄y.

#### **Abaka mopykykze katukytsa bo mytsaty mykara.**

<sup>11</sup>Abaka kamywatahawy ty okok iky. Iwahahi ipamabara ty piwatahaka. <sup>12</sup>Kytsa pahahyrinomyrykynaha asa hi:

— O ahanury ty tsizyzykiknahaktsa! iwa tsimaha zeka Deus okzeka ahamysapyrētsa tsimoziknaha — mybarapetu mykaranaha. Iwa motsasokonaha kytsa harere humo zuba. Iwaze sizubarētsa nisisokonaha:

— O simysapyrētsa mykaranaha. Hawa ha ty mysihyrinomyryky wasani my, Sudeutsa sopykwy bo yh̄y mykaranaha — maha. Iwa aparakbaha sisoho motsasokonaha anawahi mozihihiknaha. Sesus iharapatawy humo mysapyzky nihyrikosokda motsasokonaha zeka aparakbaha mysisukyrikiknaha ana pokso sipybyrētsa iwatsahi ahanury tsizyzykiknahaktsa mykaranaha. <sup>13</sup>Asahi ahanury pizyzyk tsihihiknaha iwatsahi Deus okzeka ahamysapyrētsa tsimoziknaha baija mytsaty ahabyitsa mykaranaha, asahi Moises harere tsizubarēna bo batu yh̄y mykaranaha. Aparakbaha mozihihiknaha tihi:

— O Karatas ezektsa sinury zizyzykiknaha myharere humo abaka Sudeutsa sopykwy bo hȳy mykaranaha — iwa mozihihiknaha h̄y.

<sup>14</sup>Niwazubakta! Utakta Sesus Kiristu soho zuba motsasoko. Hawa mysapyzky iharapatawyhyta humo zihyrikiknaha iwa zibezenaha. Iwatsahi katsaktsa Deus okzeka mysapyrētsa tsimoziknaha. Ana humo zuba motsaso tsihikik. Hawa ha ty aparakbaha bo ipokzitsianikia ty mytsaty mykaranaha kahumo ka hana bo ja batu waby. Anasoho ty hi batu h̄y my. Sisopykwy humo batu h̄y my. <sup>15</sup>Iwatsahi myty piak zyk zeka Deus mysoho humo ba mytsaty ziky. Myty piak zyk ahabyizeka mysoho humo ba mytsaty ziky. Sesus Kiristu harere bo hȳy tsimykaranaha ana humo zuba mytsaty mykara. Katsaktsa mysapyrētsa tsimoziknaha Sesus



humo ana humo hi zuba wasani my. <sup>16</sup>Ikiahatsaktsa kaharere bo yhỹ tsimykaranaha. Deus bo mopamykysokoze ahasoho tihi:

— O Deus myzo Sesus tuktsa Karatas ezektsa tysisapywyky. Aharere bo hyỹ mykaranaha iwatsahi ahumo sispirikporẽtsa moziknaha. Sispirikporẽtsa tu ba paikpa mytsaty zikaha tysiakusukniki tsimy — my. Ana hi Sesus tuktsa sizubarẽtsa mozihikik.

<sup>17</sup>Abaka mopykyk. Batu aty tohi zikykni. Deus wasania ty iktsasoziuku. Utakta Sesus harere humo aparakbaha ziksukyrykynaha. Kapunihikrẽta tu Sesus harere iktsasokoze sinini ikykara. Sesus pokzi sinini ikykara kanury humo iwatahawy, ana bo hi iktsa tsimykaranaha.

### **Deus pahasapywyky.**

<sup>18</sup>O katukytsa ahatsyhyryze Deus bo mopamykysoko:

— O Deus mypehakatsa Sesus Kiristu Karatas ezektsa tysisapywyky — my. Iwa mozihikik hỹ. Niwazuba. Deba.

Pauro